

10 AUG 2003

MCA-resolusi/I

MCA LULUS RESOLUSI RAKAM PENGHARGAAN KEPADA PERDANA MENTERI

KUALA LUMPUR, 10 Ogos (Bernama) -- MCA hari ini meluluskan satu resolusi bagi merakamkan penghargaan kepada Perdana Menteri, Datuk Seri Dr Mahathir Mohamad atas sumbangan besarnya dalam pembinaan negara.

Resolusi itu adalah antara 15 resolusi yang diperakui oleh Perhimpunan Agung Tahunan MCA ke-50 di sini hari ini, dan ia diluluskan ketika Dr Mahathir dijadualkan untuk menamatkan perkhidmatannya pada bulan Oktober ini.

Parti itu turut meluluskan satu lagi resolusi untuk memberikan sokongan penuh kepada timbalannya, Datuk Seri Abdullah Ahmad Badawi yang akan mengambil alih tampuk pemerintahan negara dari Dr Mahathir.

Lain-lain resolusi yang diluluskan pada perhimpunan sehari itu termasuk hal-ehwal MCA, ekonomi, pendidikan dan sosial.

"Semua resolusi itu diluluskan sebulat suara oleh para perwakilan semasa ia dibentang pada akhir sesi," kata speaker perhimpunan tersebut, Datuk Yik Phooi Hong.

MCA turut mengesa kepimpinannya untuk meminta lebih banyak kerusi dari Barisan Nasional (BN), disamping menyeru supaya peringkat anggota parti itu untuk bekerjasama rapat dengan parti komponen BN yang lain dalam menyediakan diri dengan pilihan raya akan datang.

Dalam hal ehwal parti pula, perhimpunan itu turut meluluskan resolusi untuk menyampaikan penghargaan kepada bekas Presidennya, Datuk Seri Dr Ling Liong Sik dan bekas timbalan presiden, Datuk Seri Lim Ah Lek atas sumbangan mereka kepada parti dan negara.

Parti itu turut menyokong penuh kepimpinan presiden baru, Datuk Seri Ong Ka Ting serta timbalannya, Datuk Chan Kong Choy dan mengesa anggota parti supaya menunjukkan sokongan yang tidak berbelah bahagi untuk bersatu membina kekuatan parti.

Dari aspek ekonomi, parti itu menyokong penuh semua usaha-usaha kerajaan dalam melaksanakan "Pakej Strategi Baru" kearah menjana pertumbuhan ekonomi, selepas ekonomi negara terjejas akibat perang Iraq dan penyakit Sindrom Pernafasan Akut Yang Teruk (SARS) dan ketidak tentuan dalam ekonomi global.

Mereka turut mengesa kerajaan memudahkan prosedur-prosedur birokrasi dalam perlaksanaan semua skim-skim pinjaman bagi memudahkan para usahawan Kecil dan Sederhana memainkan peranan penting mereka dalam menyuburkan ekonomi negara.

Satu lagi resolusi parti adalah untuk mengesa jawatankuasa pusat memantau perlaksanaan formula bagi memastikan ciri-ciri di Sekolah Rendah Cina berterusan dan terpelihara.

Mereka turut mengesa kerajaan untuk mengambil langkah segera menangani dan membendung gejala pengedaran bahan lucah dalam negara.

-- BERNAMA

VP AT RV AZH